

Il se racontoit, par tradition, dans le monastère de la Chase-Dieu, que nostre Pierre Roger, revenant des estudes de Paris pour se retirer dans son monastère, fust volé et mis à nud par des voleurs qu'il rencontra dans les boys de Randan en Auvergne, et que se voyant ainsi réduit à telle extrémité, il eut refuge au prieur de Thuret, nommé Estienne Aldebrand, qui le reçeut fort humainement et qui le secourut charitablement en sa pauvreté, luy faisant administrer des habits et des moyens pour se conduire en son monastère de la Chase-Dieu. Le bon frère Pierre Roger se voyant comblé de la charité dudit Estienne Aldebrand, prieur, luy dit en son despart : « Mon père, quand sera-ce que je me pourrai revenger du bénéfice que j'aye receu de vous ? » Le bon prieur, comme prophétisant, respond : « Lorsque vous serez le Souverain Pontife, vous me rendrez la revanche. » Ce qui arriva en l'année 1342 que ledit Pierre Roger fust créé pape ; mais, pour

cella il ne mit pas en oubliance le bienfaict dudict prieur de Thuret, qu'il envoya quérir en Avignon, pour estre son chambellan. En après, l'archevesché de Tholoze vaccant, il en pourveut Estienne Aldebrand (1), lequel, pour recognoissance d'un tel bien, fist bastir une chapelle dans l'esglise de Saint-Alyre de Clairmont, où il voulut estre ensevelly, et là, en ladicte chapelle, il fonda une messe, tous les jours, pour soy et pour le pape Clément VI. Vray est que l'on a tousjours doubté de ceste histoire, comme n'en ayant aucuns mémoires dans l'abbaye de la Chase-Dieu. Il est certain, néantmoins, que dans ladicte chapelle où Aldebrand est ensevelly, ladicte histoire est exprimée en vers latins, qui sont si mal polis et si mal adjencés, que je n'ay voulu les mettre icy et sur lesquels je n'ay jamais adjouté grand foy, sinon que depuis que j'ay leu la mesme chose dans deux auteurs dignes de foy, que je veux mettre icy tout du long. Le premier, Abraham Bzovius qui, outre ce, confirme ce que j'aye dit cy-dessus de Pierre Roger, dit Clément VI. En voicy les propres mots :